



BUKWASHI BWA LEZA

**Myanda ya lungike
Watson Goodman**

Gratuit—Ke ku potesha yo

BUKWASHI BWA LEZA

“Bukwashi Bwa Leza” i bishinte bya pokwa mu Mukanda wa Leza. Bintu byonso bya lumbululwa monka mu Mukanda wa Leza.

Myanda ya Leza ya fuma mwiulu i kwasha bantu ba ku saka lwine kwikala bololoke. Ange muntu wa lapila, wa fuma mu bubi, wa ita Nkambo Yesu Kristu kwikala mu mutima wandi, wa itabila ne mutima wandi onso mwi Nkambo Yesu Mupulushi wandi, sanga Nkambo u ka mu mwekela ne ku mu pela lusekelo ne mutende mu mutima. Ami mwine na itabile mu 1937, ne dino na ki ketekela mwi Nkambo ne ku pwana nandi. Ange ka munge kwitabila, ne mi papatila, mu mu nakile Kristu LELO, ekale Mupulushi ne Nkambo obe.

— Watson Goodman

BUTEMWE BWA LEZA

1

Roma 5:8

Adi Leza mwine wa mwesha butemwe bwandi kwi atwe, mwanda lo twa kidi babi, Kristu wi tu fwidile.

Yoano 3:16

Pantu Leza byo a temenwe ba pano pantanda pakata, wa pene Mwana wandi wa bushe, amba yense wa ku mwitabila kenshi onaike, adi ekale ne mweo wa nyeke.

Yoano 13:1

Lo kidilo kya Pasaka ka kyange, Yesu wa yukile byo nshita yandi ya fika ya ku fuma pano pantanda, ku ya kwi Shandi. Ne

byo a temenwe bantu bandi ba di pano pantanda, wi ba temenwe ku fika ne ku mpelesho.

Yeremiya 31:3

NKAMBO wa mwekēle kula-mpe, wa ndakile amba, Kine na ku temwa na butemwe bwa nyeke: ku lenga na ku fwenya na butemwe.

Bimwesho 1:5

Ne kwi Yesu Kristu, musapwishi wa kine, mwine mutanshi ku languka mu bafu, mwine mukata wa ku kila balopwe ba pano panshi. Awa mwine wa kwi tu temwa ne kwi tu fungula ku bubu bwetu na mashi andi.

2 YESU KRISTU I LEZA

Awa Mwanda wa di mu nte-ndekelo. Awa Mwanda wa di ne Leza, kabidi awa Mwanda wa di Leza. . .Awa Mwanda wa sangwike bu muntu ne kwikala mu bukata bwetu . . .muyulwe bupe ne kine. — Yoano 1:1 ne 14

1 Timote 3:16

Kino kifiswe kya bwina Leza kyo be tu sokwela i kikata. Kutu u kosha ku lengulula: Mwine wa mwekele mu buntunshi, wa bingishiwa mu Musingitu, wa mwekele ku bamalaika. Wa elelwa lubila mu Bagentila. Ba mwitabila pano pantanda. Wa twelwe mwiulu mu lukumo.

Yesu wa mu laka amba, Kanshi nansha na banda nenu abi, obe Filipa ku ngyukile? Muntu wa mona wa mona ne Tata. I byepi byo u laka amba, Tu lange Shobe? Kenshi wa itabila amba ami ndi mwi Tata ne Tata mwi ami? — Yoano 14:9, 10

Mateo 1:22, 23

Bino byonso bya mwekele abi amba bya lakile Nkambo ku kanwa ka nanga musapwishi, bi fike byo a lakile amba, Monai mushike u kemita, u ka sema mwana mwanamulume. Ba ka mu tela bu Emanuela (ko ku laka amba, Leza u di mu bukata bwetu).

BIYUKIDISHO BIMO BYA UBILE YESU 5

Mateo 20:30 ne 34

Kwadi bampofu babidi ba shikete ku pela kwa dishinda. Pa ku teleka Yesu u pita, ka ba bidikisha amba, I tu belele lusa obe Nkambo, Mwana wa Davida. . . Yesu wa umfwine lusa, wi ba tenga pa menso. Ponka apo ne menso abo a labuka, ka ba mu londa.

Mateo 14:19-21

Ebiya wa kambisha bantu ku shikata pa bisono, wa poka aya mikate itano ne masabi abidi, wa tala mwiulu, wa lombela. Ebiya wa mokaula mikate wa pela

bana ba bwanga, nabo ka babanya bantu. Bantu bonso ba dile, ba ikuta. Ba tolele byabo dikumi ne bibidi bya bipeso bya ku shalapo. Aba bantu ba dile ba di bu elufu itano banabalume, ku bula ku pendelako banabakashi ne banike.

Luka 5:5, 6

Adi Simona wa mu lakile amba, Mufundishi, twa ingila lwine bufuku bonso, kenshi twa kwata nangwa kamo, ino mwanda i obe wa laka, leka tu teye! Lo ba teyele, ba kwete masabi mengi lwine, a kuba ne mako-nde ka a keteka.

6 YESU KRISTU I SHAKAPANGA, I NKAMBO

Leza . . . mu ano mafuku a kwipelako, wi tu lakila mu mwana wandi, ye a lenga Leza kwikala bu mwine wa bintu byonso. I mwi aye mo a pangile dyulu ne ntanda. — Heberu 1:2

Roma 14:9

E kyo Kristu a fwidile ne ku languka ke mumi, amba ekale Nkambo wa bafu ne bomi.

Kolose 1:16

Ke pantu i mwi aye mo bya pangilwe bintu byonso bya mwiulu ne bya pano panshi, bi mweka ne bya ku bula ku mweka, nasha bilopwe bya mwiulu ne bankambo, ne bene bakata, ne ba

lubusa. Byonso bya pangilwe mwi aye, amba bikale byandi aye mwine.

Bintu byonso bya pangilwe kwi aye, kabidi kwa ku bula aye ange ka kwa pangilwe kantu nasha kamo. — Yoano 1:3

Midimo 2:36

Ku lenga anwe bena Israela bonso mu yuke biya amba uno Yesu ye mwa popele pa musalabu, Leza wa mu pela bu Nkambo ne bu Kristu.

1 Korinda 1:9

Leza Mwine i wa kine, wi mīta kwikala bamo ne Mwana wandi Yesu Kristu Nkambo wetu.

YESU KRISTU I SUSHI WA BONSO

7

Yoano 5:22

Kabidi shandi kenshi u keta myanda ya bantu, adi wa pa Mwana busushi bonso.

Roma 14:10

Adi obe i mwanda ka u fwitishisha mwanenu? Kabidi mwanda ka u sula mwanenu? Pantu atwe bonso tu kemana ku kipona kya kidye kya Leza.

2 Timote 4:1

Na ku lapisha ku menso a Leza ne a Kristu Yesu, Mwine u ka keta myanda ya bomi ne bafu. Na ku lapisha pa mwanda wa kwiya kwandi lo a ka mweka mu bulopwe bwandi.

Mateo 25:32

Bantu ba mikoka yonso ba ka bungilwa mu kyeni kyandi. Ne aye u ke ba lekanya umo na mukwabo, byonka bi lekanya kafungo mikoko ne bambushi.

Roma 2:16

Adi ku kekala lufuku lo Leza u ka sambisha bantu pa bifiswe byabo byonso, ne sushi i Yesu Kristu, monka mwaila lubila lwa ku wama lo ndi ku sapula.

Midimo 10:42

Wi tu kambisha ku sapula ku bantu ne kwi ba bula amba ye wa tongolwa kwi Leza amba ekale sushi wa bomi ne bafu.

8 MUKUJI WETU I YENKA KRISTU

Yoano 10:9

Ami ndi kibelo. Ange muntu wa twelela pe ami u ka puluka, u ka twela ne ku tamba kasha a mona bya ku dya.

Yoana 14:6

Yesu wa mu laka amba, Ami ndi dishinda ne kine ne mweo. Kutu u kosha kwiya kwi Tata poso mwi ami.

Yoano 8:24

E kyo ne mi lakila amba, mu ka fwa mu bubi bwenu, pantu ange ka mwitabile amba i ami aye, sanga kine mu ka fwa mu bubi bwenu.

Heberu 5:9

Kabidi pa ku pwa ku lumbuluka mu byonso, wa sangwike aye Mwine ke lupulukilo lwa nyeke lwa aba ba mu nakila.

Midimo 4:12

Kutupu lupulukilo mu muntu ungi, pantu ka kudi dizina dingi muno munshi mwa dikumbi dyo ba pela bantu mo tu kosha ku pulukila.

Heberu 7:25

Kyo a kosesha kwi ba pulusha kwa kine kine aba ba fwena kwi Leza mwi Aye, pantu i mumi nyeke, wi ba nyangwila kwi Leza.

MUKUJI WETU I YENKA KRISTU

9

Pantu Mwana wa muntu wa iya ku saka ne ku pulusha ba kweleka. — Luka 19:10

I Leza wa lenga anwe mwikale mwi Yesu Kristu, ye a sangula ke mano etu ne bololoke bwetu ne ku shidikwa kwetu, ne bukuji bwetu. — 1 Korinda 1:30

Kolose 1:12-14

Mu santile Leza Tata wi tu lenga netu kwikala ba ku fwaninwa ku pewa bintu byo a ka pana ku bashidikwe, amwa mwa ku toka to. Wi tu pokolola ku bulobo bwa mfinshi, ne kwi tu twesha mu bulopwe bwa Mwana wandi mutemwiwe. I mwi aye mo

twa mwena bukuji ne lulekelo lwa myanda yetu.

Wipene mwanda wa atwe, amba e tu kule ku bibi byonso, ne kwi tu tokesha aye mwine, atwe bo a saka twikale bantu bandi, ba ku sumininwa midimo ya ku wama. — Titusa 2:14

Bimwesho 5:9

Ka bembe lwimbo lupya amba, I yenka obe wa fwaninwa ku poka au mukanda, ne ku lamuna bupula bo ba lamikamo, pantu wa tapilwe. Wa mu kũdila Leza na mashi obe bantu ba mikoka yonso, ne ndimi, ne bantu ba byalo byonso.

10 MASHI A KRISTU O E TU PWANIKISHA NE LEZA

Efesa 1:7

I mwi aye mo tu mwena bukuji, ne lulekelo lwa myanda yetu mu mashi andi, monka mwaila bupe bwandi bukata.

1 Yoano 1:7

Adi ange twenda mu kikela byonka byo a di mu kikela aye mwine, sanga tu di mu kipwani kimo atwe bene ne bene, ne mashi a Mwana wandi Yesu e tu tokesha ku bubi bonso.

1 Petero 1:18, 19

Mwa yuka byo mwa kulwa ku aya misango ya kele ya bashakulu benu. Kenshi mwa kulwa ne bintu bi onaika, bi di mpa-

lata nansha nsahabu. Adi mwa kulwa na mashi maneme, mashi a Kristu, ko kana ka mukoko ka ku bula bulema nansha kabi.

Roma 5:9

Adi po pene dino byo twa bingishiwa mu mashi andi, tu ka puluka ku bukadi bwa Leza mwanda wa aye.

Heberu 9:14

Po pene mashi a Kristu, wila-mbwile mwine kwi Leza mu bulobo bwa Musingitu wa nyeke kwa ku bula bulema, ao ke a kosha ku tokesha mitima yenu, amba mu leke midimo ya lufu, ka mwingidila Leza mumi.

TWA PULUKA PA KWITABILA MWI KRISTU 11

1 Yoano 5:4

Wa semwa kwi Leza ye wi pa shinda pano pantanda. Lwitabilo lwetu lo lwi pa shinda pano pantanda.

Roma 5:1

Ku lenga byo twa bingishiwa ku lwitabilo, tu di mutende ne Leza mwi Nkambo wetu Yesu Kristu.

Efesa 2:8, 9

Pantu i bupe bo mwa pulukila pa kwitabila, kenshi i kya kwimwena anwe bene. I bupe bwa Leza. Kenshi i kya ku midimo yenu, yo. Ku lenga kutu muntu u kosha kwitota.

Galatia 5:6

Pantu mwi Kristu Yesu bwina luonde ne ku bulwa luonde byonso i bya bitu, poso lonka lwitabilo lwingila midimo mu butemwe.

Yoano 6:28, 29

Ba mu laka amba, Ki saka tube ka amba twingile midimo ya Leza? Yesu wi ba londoloka amba, Midimo i saka Leza i kwitabila mwi awa ye a tumine.

Yoano 20:31

Adi bino bya lembwa amba mwitabile amba Yesu i Kristu Mwana wa Leza, ne pa kwitabila mu mone mweo mu dizina dyandi.

Adi lusa lwa NKAMBO i lwa nyeke ne nyeke ku aba ba mu tina. Bololoke bwandi bu ka lunduluka ne ku bana ba bana babo. — Nimbo 103:17

Pantu lusa lobe i lukata, lwa ya mwiulu ku kila ne makumbi: ne kine kyobe kya fika ne mwiulu. — Nimbo 108:4

Nimbo 103:11

Pantu byonka byo mwiulu mwa lēpa na pano panshi, byo bya baya ne lusa lwandi ku ba ku mu tina.

Mika 7:18

I Leza ka u di bwa obe, u lekela ba bubi, ne ku bula ku lo-

ndalonda bubi bwa bantu bandi ba shalapo? Bukadi bwandi kenshi bu yayaya pantu wa temwa ku belela bantu lusa.

Madilo (Mābisho) 3:22, 23

Kine lusa lwa NKAMBO kenshi lwa pwa, butemwe bwandi kenshi bu pwa, I bupya lukelo ku lukelo: obe u di wa ku bula kwaluka nansha panene.

Wi tu pulwishe, kenshi mwanda wa bintu bya ku wama byo twa ubile, adi mwanda wa lusa lwandi bitu. Twa samfishiwa pa ku semwa dibidi, ne ku sangu-lwa bapya ku bulobo bwa Mupiritu wa lwafyo. — Titusa 3:5

Mateo 11:28

Iyai kwi ami, anwe bonso ba tukuta na midimo ne bipe bya ku nema, sanga ami nke mi pa ku tusha.

Bimwesho 22:17

Muspiritu ne mwine musongwa ba laka amba, Iya Nkambo. Wa ku teleka ino myanda a lake amba, Iya. Muntu u di ne kilaka eye, a poke mema a mweo a bupe bitu.

Isaya 55:1

He! anwe bonso ba di ne kilaka, iyai mu poke mema; nansha ba ku bula ndalama, iyai

mu pote bidyo mu dye iyai mu pote vinyu ne maziba kwa ku bula ndalama kwa ku bula ne kyo mu panako.

Yoano 7:37

Lufuku lwa kwipelako lo lwine lukata lwa kidilo. Yesu wa imene wa bidikisha amba, Yense wa kilaka eye kwi ami a tome.

Isaya 1:18

NKAMBO wa laka amba, Iyai dino twiteleke: bubi bwenu nansha bwa tila, bu ka toka bwa teluji; nansha bwa tila bwa masala a nduba, bu kekala bwa boya bwa ku toka.

14 BANTU BAMO KENSHI I BANA BA LEZA

Bino byo bya ku yukilako ne bana ba Leza ne bana ba Diabola: wa ku bula kuba bya bololoke nansha wa ku fulwa mwanabo, kadi wa Leza. — 1 Yoano 3:10

Roma 8:14, 15

Pantu ba londwelwa ku Muispiritu wa Leza bo bana ba Leza. Pantu kenshi mwa pewa mutima wa busha, wa moyo, adi mwa pewa mutima wa bu mwana, witu lenga kwita Leza amba, “Abba”, ko ku laka amba Tata.

Filipi 2:15

Mwikale ba ku bula bulema nansha kabi, bu bana ba Leza ba ku bula mwanda, mu bukata

bwa bantu bakondame ba ku pondoka, mo mu mweka bwa bikela pano pantanda.

2 Korinda 6:17, 18

Ku lenga monka mwa lakila mwine Nkambo, Tambai mo ba di, mwipatule, ke ku tenga kijiluke, sanga nke mi pokelela biya. Kabidi Mwine Nkambo kilobo wa laka amba, Nkekala Shenu, nenu mu kekala bana bami banabalume ne banabakashi.

Yoano 1:12

Adi bonso ba mu pokelele wi ba pele luhusa lwa ku sanguka bu bana ba Leza, bo aba ba kwitabila mu dizina dyandi.

BYA LAKA LEZA MWANDA WA KU KOLWA 15

Malwa abo aba ba languka lukelokelo, kwenda ku saka bitomwa bya bukadi; bekala ku toma ne bi pona kate, vinyu bi ba lenga ku kolwa. — Isaya 5:11

Bishimikisho 23:31, 32

Ke ku tala ku vinyu lo bya tila, lo bya lelema mu kitomeno, lo bi pita biya pa mukoshi. Kuntanshi bi sumana bwa nyoka, bi sumana bwa kipidi.

Wela midimo ya buntunshi ya yukanika: bukende, bubi, byonso bya nsoni, bupupankishi, bunñanga bwa lubuko, kwifulwa, lutobo, bukwa, kipile, kwiketekela, bulekanye, bwikete, lunkumbwa,

bunkolwankolwa, makayo onso a mu ku kolwa, ne byonso bya au musango. Ne mi dimuna, byonka byo ne mi dimwinine kala amba, ba kuba bintu bya au musango kenshi ba ka swane bulopwe bwa Leza. — Galatia 5:19-21

Roma 13: 13, 14

Twikale biya mwa fwaninwa bantu benda mu kate, kenshi mu biwowo ne bunkolwankolwa, kenshi mu bukende ne bintu bya nsoni, nansha mu lutobo ne bukwa. Adi fwalai Nkambo Yesu Kristu, kabidi ke ku langulukila dimo bya buntunshi mu ku saka kuba mwaila lwinso lwa buntunshi bwenu.

Bishimikisho 16:25

Kudi dishinda di bepesha buya, adi ko di twala i ku bonaiké.

Marko 10:17-22

... Obe Mufundishi wa ku wama, kamba ki saka ngube kika amba mpewe mweo wa nyeke? Yesu amba, Mwanda ka u ntela bu wa ku wama? Kutu muntu wa ku wama, poso Leza yenka. Ke wa yuka Mijilo ya Leza: Ke ku tapana. Ke ku bala bukende. Ke kwiba. Ke ku laka bya bubela. Ke ku dimbana. Nemya shobe ne inobe. Aye amba Mufundishi, abi byonso ne bi lama ku fuma ne ku bwanike. Yesu pa ku mu tala wa umfwa ku mu temwa, wa

mu laka amba, Wela wa bulwa kintu kimo. Yanga u ka poteshe byonso byo u di nabyo. Ndalama u pane ku balanda, sanga u kekala ne busambashi mwiulu. Kabidi pa ku pwa kuba abi, wiye u nonde. Adi aye pa ku teleka abi, kilungi kya fita, wa ya ne kafitwe, pantu wa di musambashi, wa di ne bintu bingi.

Mateo 22:37, 38

Yesu wa mu londoloka amba, I wa ku laka amba, U ka temwa Nkambo Leza obe ne mutima obe onso, ne mweo obe onso, ne mano obe onso. Au o mukambishilo mukata ne wantanshi.

Adi ke kwidimba mu ku teleka bitu kwa ku bula kuba kyo be mi laka. — Yakoba 1:22

Efesa 5:6

Ke ku leka muntu e mi dimbe na myanda ya kele, mwanda abi bintu bi leta bukadi bwa Leza pa ba ku bula ku mu nakila.

1 Korinda 6:9, 10

Ka mu yukile amba babi kenshi ba ka pewa bulopwe bwa Leza? Ke kwidimba. Ba bubi ne bapupankishi ne ba bukende ne ba bubi bwa banabalume bene ne bene, ne bangifi ne ba lwinso ne bankolwankolwa ne ba matuka

ne tupondo, kenshi ba ka pewa bulopwe bwa Leza.

1 Yoano 3:7, 8

Anwe bana bami ke ku leka muntu e mi dimbe. Wa kuba bintu bya ku wama i mololoke, byonka byo Kristu mwine i mololoke. Wa kwikala ku bala myanda i wa Diabola, pantu Diabola u bala myanda ku fuma ne ku ntendekelo. Ne Mwana wa Leza kyo a mwekele i konaula midimo ya Diabola.

Galatia 6:3

Ange muntu wiketekela, aku i wa bitu, sanga widimba mwine.

Ku lenga byonka byo bubu bwa ishile pano pantanda ku muntu umo, nabo bwa leta lufu, sanga lufu, lwa kumana mu bantu bonso, mwanda bonso i ba myanda. — Roma 5:12

Yakoba 1:15

Kabidi lwinso pa kwimita lu sema bubu, bubu nabo pa ku pwa ku koma, bu sema lufu.

Ezekela 18:20

Muntu wa bala bubu ye u ka fwa. Mwana kenshi a ka twikwe bubu bwa shandi, nansha shandi kenshi a ka twikwe bubu bwa mwana. Bololoke bwa mololoke

bu kekala pe aye mwine, ne bubu bwa mubi bu kekala pe aye mwine.

Bishimikisho 11:19

Muntu wa ku sumininwa kubu bya bololoke u ya ku mweo: adi wa ku londalonda bubu u ya ku lufu.

Kya fwaninwa tube kidilo ne ku sekela, pantu uno mwanenu wa fwile, dino ke mumi. Wa eleke, dino wa mweka. — Luka 15:32

Roma 8:6

Bi languluka buntunshi i bya lufu, adi milangwe ya Muspiritu i mweo ne mutende.

Luka 7:14, 15

Ponka apo Yesu wa fika, wa tenga pa makila padi mufu. Bene ba ku mu sela ka bemene talala. Ebiya wa mu laka amba, Obe nsongwalume, ami na ku laka, Languka! Ponka apo awa muntu mufwe wa shikata, wa tendeka ne ku laka.

Yoano 11:43, 44

Pa ku pwa ku laka abi wa bidikisha ne diwi dikata amba, Lazaro! tamba. Ne kine awa wa fwile wa tamba mukutwe maboko ne mauulu na bisandi, ne pa

menso ba kutilepo kitambala. Yesu wi ba laka amba, Mu kutululei, ende.

Yoano 10:17, 18

Kyo kya ntemenwa Tata, pantu mpana mweo wami ne kwi u poka dibidi. Ka padi wa ku nsompolao. Ne u pana ami mwine. Ndi ne luhusa lwa kwi u pana, kabidi ndi ne luhusa lwa kwi u poka dibidi, kyo kya nkambishe Tata.

Bimwesho 1:18

Na fwile, dino ndi mumi nyeke ne nyeke. Kabidi ndi ne mfungulo ya lufu ne ya kalunganyembo.

Ku Pituluka (Mpitulukilo) 5:7-21

Obe ke kwesha kwikala ne baleza bangi pe ami.

Ke kwesha kwisongela nkishi, nansha kintu kingi kya ku pala kya mwiulu mwine, nansha kya munshi mwa mushidi, nansha kya mu mema munshi mwa mushidi: Ke kwesha kwi bi fukamina, nansha kwi bingidila . . .

Ke kwesha ku tela dizina dya NKAMBO Leza obe kiteletele: pantu Nkambo kenshi a ka mu bingishe wa ku tela dizina dya ndi kiteletele.

Languluka lufuku lwa sabado,

wi lu lame, Iwikale lwa lwafyo, monka mwa ku kambishisha NKAMBO Leza obe. U kengila mafuku mukaka mo u kengila midimo yobe yonso . . .

Nemya shobe ne inobe, monka mwa ku kambishisha NKAMBO Leza obe . . .

Ke ku tapa.

Ke ku bala bukende.

Ke kwiba.

Ke ku bepela mukwenu bubela.

Ke ku kumbwa mukashi wa mukwenu. Ke ku kumbwa nzubo ya mukwenu, nansha budimi bwandi, nansha mwingidishi wandi mwanamulume, nansha mwingi-

dishi wandi mwanamukashi, nansha ñombe wandi, nansha ki-

mbulu kyandi, nansha kintu kyonso kya mukwenu.

KENSHI MU KOSHA KU FYAMA KWI LEZA 21

Luka 8:17

Pantu ka padi kifiswe ki ka bula ku sokoka, nansha kya mfi-so ki ka bula ku yukwa, ne ku sokolwa pa toka.

Bishimikisho 15:3

Menso a NKAMBO a di ponso bitu, a tala babi ne ba ku wama.

Yoba 34:21, 22

Pantu menso andi a tala mu ya muntu, u mona monso mo endela. Ka kudi mfinshi nansha ya ku fita bye, mo ba kosha ku fyama ba kuba bibi.

Yeremiya 23:24

NKAMBO wa laka amba, Muntu a koshe ku fyama pi pa kuba mfilwe ku mu mona. NKAMBO wa laka amba, Ami ke na kumana mwiulu monso ne panshi.

Ñimbo 139:8 ne 12

Ange na kanda mwiulu, obe u dimo: nansha ndale mu kalunganyembo, obe u di monka. . . . Adi kwi obe mfinshi kenshi ya fita; bufuku bwa toka bitu na kate, ne mfinshi i di bwa kikela.

22 BAMBULWA LEZA BA KA MONA MALWA NYEKE

Ñimbo 9:17

Babi ba ya mu kalunganyembo, aba bena byalo bonso ba ku labukila Leza.

Mateo 18:8

Ange kuboko kobe nansha kulu ku saka ku ku ponya, wi ku keteko wi kwele. Kya ku waminako ku twela mu mweo bu kilema ku kila kwelwa mu mudilo wa pe na maboko abidi nansha mauu abidi.

Mateo 13:41, 42

Mwana wa muntu u ka tuma bamalaika bandi, ba ka fumyamo mu bulopwe bwandi bintu byo-

nso bi lenga bantu ku bala bubi, ne bonso ba kuba bibi. Ba ka poswa mu kilunga kya mudilo, mo mu kekala madilo ne ku she nkanya meno.

2 Petero 3:7

Kabidi i konka kanwa ka Leza ka laka dino, amba adi dyulu ne ntanda bi dipo lelo bya tulwa, bi pembela ku sokwa na mudilo mu lufuku lwa kidye lo ba konaula babi bonso.

Mateo 25:46

Ku lenga aba bantu ba ka ya mu malwa a pē, adi bololoke ba ka ya ku mweo wa pē.

Bantu ba toagwelwa ku fwa dimo bitu, ebiya ku lutwe ke kidyе. — Heberu 9:27

1 Yoano 4:17

Pano po pa lumbulukila butemwe mwi atwe, amba kenshi twikale ne moyo mu lufuku lwa kidyе, pantu byonka byo a di aye mwine, byo tu di ne atwe pano pantanda.

Midimo 17:31

Pantu wa tongola lufuku lo a ka keta myanda ya ba pano pantanda mu bololoke. Ne mwine u ke ba ketela myanda i yanka awa muntu ye a tongola, ye

a yukisha ku bonso pa ku mu langula mu bafu.

2 Korinda 5:10

Pantu atwe bonso bitu i kwi- mana ku kipona kya kidyе kya Kristu, amba tu fwetwe muntu ku muntu monka mwaila byo a ubile lo a kidi mu mubidi, nasha bya di bya ku wama nasha bya ku bipa.

2 Petero 2:9

Nkambo wa yuka mwa kwi ba pokolwela mu kwesekwa bantu ba ku mu papa. Kabidi u lama babi, ku pembela lufuku lwa kidyе lo a ke ba manika.

Tu mu santile Leza pa bupe bwandi bwa ku shinka ne bulaka. — 2 Korinda 9:15

Roma 5:15

Ino abwa bupe bitu kenshi bu di pamo ne abwa bubu. Ke pantu byo bengi ba fwa mwanda wa bubu bwa muntu umo, po pene abwa bupe bwa Leza bo a pana mwi muntu umo Yesu Kristu, bwa kisha ku kumana mu bengi ne ku fula.

Roma 9:16

Ku lenga kenshi i ku kiswamutima kya muntu, nansha ku bulobo bwandi yo, adi i ku lusa lwa Leza bitu.

Leza u kosela ba kwitumbika, adi u mwesha bupe bwandi ku ba kwikefya. — 1 Petero 5:5

Midimo 4:33

Baluwe ba di ku sapula ne bulobo bukata byo ba mwene Nkambo Yesu lo a langwike mu bafu. Bupe bukata bwa Leza bwa di pa bonso.

2 Korinda 8:9

Pantu mwa yuka bupe bwa Nkambo wetu Yesu Kristu. Nansha wa di musambashi, wisangwile bulanda mwanda wa anwe, amba mu abwa bulanda bwandi anwe mu mwenemo busambashi.

Midimo 2:38

Petero wi ba laka amba. Lapilai anwe bonso ne ku batishiwa mu dizina dya Yesu Kristu bubi bwenu bu lekelwe, mu pewe Mupiritu wa lwafyo.

Mateo 3:2

Wa di ku laka amba, Lapilai, pantu bulopwe bwa mwiulu ka bu di pepi.

2 Korinda 7:10

Leza pa ku lenga muntu ku fitwa, sanga u lapila ne ku puluka, kenshi winyengela. Adi ku fitwa kwa ba pano pantanda ku leta lufu.

Midimo 17:30

Aya myaka ya buluba mano Leza wi i sulako, dino u kambisha bantu ba konso amba ba lapile.

Luka 13:3

Ami ne mi bula amba, Yo, adi ange ka mu lapile, sanga nenu mu ka fwa bonso byonka abya.

Midimo 3:19

Kanshi lapilai ne kwaluka mu mitima, bubi bwenu bu shimañaniwe, amba Mwine Nkambo e mi pe myaka ya ku wama ya mutende.

Mateo 6:14

Pantu ange mu lekela bantu myanda yabo, sanga Shenu wa mwiulu nandi u ke mi lekela ne-nu bibi byenu.

Ezekela 18:21

Adi ange mubi wa fuma ku bubu bwandi bo a bala, kā lama mikambishilo yami yonso, ne ku-ba bintu bya ku wama bya bololoke, sanga u kekala ne mweo, kenshi a ka fwe.

Isaya 55:7

Muntu mubi a leke dishinda dyandi, ne muntu wa bubu a leke milangwe yandi: a bwelele kwi

NKAMBO, u ka mu belela lusa; a bwelele kwi Leza wetu, pantu u ka mu lekela byonso bitu.

Bimwesho 3:20

Buno na imana pa kibelo ne ku pika hodi. Ange muntu wa teleka diwi dyami, wa shinkula kibibi, sanga ami ntwela mo a di, tu dya nandi pamo, aye ne ami.

Midimo 5:31

Kabidi Leza wa mu sansula, wa mu tula ku kuboko kwandi kwa ludyo, wa mu pa bu kilongoshi ne bu mupulushi, amba a lenge bena Israela ku lapila, ba lekelwe bubu bwabo.

Kabidi ke kwibika mu bintu bya mfinshi byuba bantu, bya ku bula ne kya ku wama kyo ba mwenamo. Ki saka kwi ba lengulula. — Efesa 5:11

Ke ku bika mitima yenu ku bintu bya pano panshi, poso byonka bya mwiulu. — Kolose 3:2

1 Yoano 2:15, 16

Ke ku temwa pano pantanda, nansha bya pano pantanda. Ange muntu wa temwa pano pantanda sanga kadi ku temwa Leza Tata mu mutima wandi. Pantu byonso bino bya pano pantanda, lwinso lwa buntunshi, ne byo-

nso bi kumbwa menso, ne byonso bya lukumo lwa pano panshi, abi byonso kenshi i bya Tata, i bya pano pantanda.

Titus 2:11, 12

Pantu bupe bwa Leza bwa ku pulusha bantu bonso bwa mweka. Bwi tu fundisha ku kana bumbulwaleza, ne lwinso lwa bintu bya pano pantanda, amba twikale ba ku tekanya, bololoke, ba ku sumininwa mu bwina Leza pano pantanda.

Isaya 1:16

Sambai, itokeshei; mu fumye mu kyeni kyami abya bibi byo muba; lekai kuba bubi.

Ezekela 36:26

Nke mi pa mutima mupya, ne katimatima kapya nke ka bikamo: ne awa mutima wa dibwe nka fumyamo, ne ku bikamo mutima munake.

1 Yoano 2:29

Byo mwa yuka amba Leza i mololoke, sanga mu yuke amba ba kuba bya bololoke bo ba semwa kwi aye.

Yoano 3:3

Yesu wa londoloka amba, Kine, kine, na ku bula, ange muntu ka semenwe dibidi, kenshi a koshe ku mona bulopwe bwa Leza.

2 Korinda 5:17

Ku lenga ange muntu u di mwi Kristu sanga wa pangwa kipya. Bya kala bya pita, dino ke bipya.

1 Petero 1:23

Pantu mwa semwa dibidi ku myanda ya Leza, myanda myumi ya nyeke, kenshi ku lubuto lwa ku bola, adi i lwa ku bula ku bola.

1 Yoano 5:18

Twa yuka amba muntu wa semwa kwi Leza kenshi u bala bubi, mwanda wa semwa kwi Leza wilama, ne awa mubi kenshi a koshe ku mu tenga.

TWA FWA KU BUBI—TWA LANGULWA MWI KRISTU

29

Galatia 5:24

Bantu ba Kristu Yesu ba pwa ku popa pa musalabu buntunshi bwabo, ne lwinso lwabo, ne byonso byo bu saila.

Efesa 2:1 ne 6

Ne anwe mwa di bafu mu bumbalamyanda ne bubu bwenu . . . Wi tu langwile pamo ne aye, ne kwi tu shikatisha mwiulu mwi Kristu Yesu.

1 Petero 2:24

Aye mwine wa selele bubu bwe-tu mu mubidi wandi pa ku fwa ku akya kiti, amba tu leke bubu

na atwe ba fwa kala, tu londe byonka bya bololoke. Anwe mwa undapwa mwanda wa bipumo byo a puminwe.

Roma 6:2 ne 11

Atwe ba fwile ku bubu tu sa kwikadidilamo byepi? Byonka abi, mwilangulukile bwa bafwe ku bubu, adi bwa bomi kwi Leza mwi Kristu Yesu.

Kolose 3:1

Ku lenga byo mwa langulwa pamo ne Kristu, mu sake bintu bya mwiulu mu di Kristu, mo a shikata ku ludyo lwa Leza.

Pantu u byala mu buntunshi bwandi, sanga mu buntunshi bwandi u kangulamo bya ku bola; adi u byala mu Musingu u kangula mweo wa nyeke mu Musingu. — Galatia 6:8

Kabidi byonka bya imike Mosesa nyoka muntanda mututupu, byo bi kemikwa ne Mwana wa muntu, amba yense wa kwitabila mwi aye, ekale ne mweo wa nyeke. — Yoano 3:14, 15

Yoano 17:3

Mweo wa nyeke i ku ku yuka obe Leza yenka umo wa kine, ne Yesu Kristu ye wa tumine.

Yoano 3:36

Wa kwitabila mu Mwana u di ne mweo wa nyeke. Wa ku bula ku nakila Mwana kenshi a ka mone mweo, adi bukadi bwa Leza bu di pa mutwe wandi.

Pantu mfweto ya bubi i lufu, adi bupe bwa Leza i mweo wa nyeke o a pana mwi Yesu Kristu Nkambo wetu. — Roma 6:23

Yoano 5:24

Kine kine ne mi bula amba, Wa teleka mwanda wami ne ku mwitabila wa ntumine, u di ne mweo wa nyeke. Kabidi kenshi a ka twele mu kidye, adi wa fuma mu lufu, wa twela mu mweo.

Isaya 32:17

Midimo ya bololoke i ka leta mutende; ne bololoke bu ka lenga mutende talala ne luketelo nyeke.

Galatia 4:6

Ne byo mu di bana, Leza wa tuma Musingitu wa Mwana wandi mu mitima yetu, ye wi tu lenga kwita Leza amba, Abba, ko ku laka amba Tata.

1 Yoano 3:18, 19

Anwe bana bami, butemwe bwetu kenshi bwikale bwa pa kanna bitu, bwa ludimi, adi bwikale bwa kine, bwa ku mweka mu byubilo byetu. Po tu ka yu-

kila byo tu di ba kine, ne mitima yetu kenshi i ke tu shinina kwi Leza.

Musingitu wi tu bula, ne mitima yetu itabisha, amba kine tu di bana ba Leza. — Roma 8:16

Kino kyo twa yukilako amba tu kelwa mwi aye, ne aye mwi atwe, mwanda wi tu pela Musingitu wandi. — 1 Yoano 4:13

Yoano 14:21

U di ne mikambishilo yami ne kwi i lama ye wa ntemwa, ne wa ntemwa u ka temwiwa kwi Tata, ne ami nka mu temwa, ne kwisokola ami mwine kwi aye.

32 KRISTU U LETA LUSEKELO MU MUTIMA

Yoano 17:13

Dino ke ngiya ko u di. Nda-ka bino bintu pano pantanda amba lusekelo lwami lu baye mu mitima yabo.

Pantu kishinte kya bulopwe bwa Leza kenshi i ku dya ne ku toma, adi i bololoke ne mutende ne lusekelo mu Musingitu wa lwafyo. — Roma 14:17

Galatia 2:20

Na pwa ku popwa pamo ne Kristu pa musalabu. Ku lenga kenshi ami mwine ngikala bumi dino. Uno mweo o ndi nao, i Kristu u di munda mwami. Ku lenga dino pa kwikala pano pa-

ntanda, ngikala kasha ndi ne lwitabilo mu Mwana wa Leza, wa ntemenwe ne kwipana Mwine mwanda wa ami.

Isaya 12:3

Ku lenga mu ka ya ne lusekelo ku ka teka mema mu nsulo ya mema a lupulukilo.

Nimbo 16:11

Wa ngyukisha dishinda dya mweo: mu kyeni kyobe mudi lusekelo lukata; ku ludyo kobe ku-di lusekelo lwa nyeke.

Yoano 15:11

Ne mi laka bino bintu amba lusekelo lwami lwikale mwi anwe, ne lusekelo lwenu lu fule.

Bimwesho 22:14

Ba ku kansa bisandi byabo i ba dyese, bo ba di ne luhusa lwa ku dya ku kiti kya mweo, ne ku twelela pa bibelo bya mushi.

**Ku Pituluka (Mpitulukilo)
11:26-28**

Monai, lelo na bika ku menso enu dyese ne mafinge; I dyese, ange mu nakila mikambishilo a NKAMBO Leza wenu, yo ne mi kambisha lelo: I mafinge, ange kenshi mu nakila mikambishilo ya NKAMBO Leza wenu.

Ne anwe ba manama u ke mi pa butusho pamo ne atwe, lo Nkambo Yesu a ka mweka ku

fuma mwiulu ne bamalaika bandi ba bulobo. U ka mweka mu lubebe lwa mudilo. U ke ba mwesha malwa ba ku bula ku yuka Leza, ba ku bula ku nakila myanda ya ku wama ya Yesu Nkambo wetu. Ba ka mweshiwa malwa a bonaike bwa nyeke, ba ka pangwa mu kyeni kya Nkambo, ne ku lukumo lwa bulobo bwandi. — 2 Tesalonika 1:7-9

Roma 6:16

Ka mu yukile amba, ange mwi-teka ku muntu bu basha, sanga mu mu nakila bu basha bandi. Ange i bubi bo mu nakila, sanga i lufu, ange i Nkambo ye mu nakila, sanga mu kekala bololoke.

Filipi 2:11

Ne tunwa tonso tu ka tota Yesu Kristu bu Nkambo, ne ku kumusha Leza Tata.

Mateo 10:32, 33

Muntu wa ku ndakila ku menso a bantu, nami nka mu lakila ku menso a Tata u di mwiulu. Adi yense wa ku nkana ku menso a bantu, nami nka mu kana ku menso a Tata u di mwiulu.

Roma 10:9, 10

Pantu ange wa laka ku kanwa kobe amba Yesu i Nkambo, ne kwitabila mu mutima obe amba Leza wa mu langwile mu bafu,

sanga wa puluka. Pantu i pa kwitabila mu mutima po muntu a mona bololoke, ne pa ku laka ne kanwa kandi amba, Na itabila, sanga u puluka.

1 Yoano 2:23

Wa ku kana Mwana u kana ne Leza Shandi. Wa kwitabila mu Mwana wa itabila ne mwi Shandi.

Luka 9:26

Pantu ange muntu wa ñumfwina nsoni ami, nansha myanda yami, Mwana wa muntu nandi u ka mumfwina nsoni lo a keya mu lukumo lwandi, ne lwa Shandi, ne lwa bamalaika ba lwafyo.

2 Tesalonika 2:9

Awa kapondo u keya mu luhusa lwa Satana. U koba biyukidisho bya bulobo, ne bya ku kumya bya bubela.

1 Petero 5:8

Tekanyai ne ku dimuka. Diabola, mulwani wenu, wenda u shokoloka bwa ntambo u buluma, u saka ba ku dya.

Mateo 4:1 ne 10, 11

Ponka apo Musingitu wa twala Yesu muntanda mututupu ku kessekwa kwi Diabola. . . . Adi Yesu wa mu laka amba, Obe Satana, mfumine apa, ke kya lembwa amba, U kekala ku popwela yenka Nkambo Leza obe ne ku

mwingidila yenka aye. Ebiya Diabola wa mu shiya, ponka apo bamalaika ba iya ke ba mu kwasha.

Efesa 6:11

Fwalai byela byonso bya bulwi bya Leza, amba mu koshe kwimana pa ku lwa ne Diabola wa bukengeshi bukata.

Midimo 26:18

U ke ba butula menso, u ke ba fumya mu mfinshi amba ba mone kikela. Kabidi u ke ba fumya mu bulobo bwa Satana, kwi ba leta kwi Leza. Kabidi pa ku ngitabila ba ka lekelwa bubi bwabo, ne ku shukila bintu byo ba pewa bonso ba ku shidikwa.

Ebiya awa kapondo u ka sokoka, adi Nkambo Yesu u ka mu tapa ne ku monaula ku mupuya wa mu kanwa kandi, lo a ka mweka Mwine mu lukumo Iwandi.

— 2 Tesalonika 2:8

Yakoba 4:7, 8

Ku lenga nakilai Leza, adi Satana mu mu kosele, sanga u ka nyema, u ka fuma ko mu di. Fwenai kwi Leza, nandi u ka fwena ko mu di.

Roma 8:35 ne 37

I ani u ke tu lekanya ku butemwe bwa Kristu? Kamba i lumanamo, nansha mikokolo, nansha lupangopango, nansha ki-

powe, nansha bwamba, nansha lufu, nansha lupanga? . . . Mu binobyonso twa shinda ku kila ne mu ku shinda, mwanda wa mwine wi tu temwa.

Wa kwikala ku bala myanda i wa Diabola, pantu Diabola u bala myanda ku fuma ne ku nte-ndekelo. Ne Mwana wa Leza kyo a mwekele i konaula midimo ya Diabola.

— 1 Yoano 3:8

Heberu 2:14

Bana byo ba di na mubidi wa mashi, sanga Yesu nandi wa po-kele mubidi wa mashi, amba aye pa ku fwa onaule Diabola, mwine wa luhusa Iwa lufu.

BUTEMWE KYO KISHINTE KYA BWINA KRISTU 37

1 Yoano 4:20

Ange muntu u laka amba, Na temwa Leza, aku kasha a fulwa mwanabo, sanga i wa bubela. Wa ku bula ku temwa mwanabo ye a mona, a koshe bye ku temwa Leza ye ka mwene?

Galatia 5:22, 23

Adi bipangwa bya Muspiritu i butemwe, lusekelo, mutende, ku teka mutima, lusa, mutima wa ku wama, bu muntu wa kishinka, bukokekoke, ku tekanya pa byonso.

1 Korinda 13:1

Nansha ngyuke ku laka milako yonso ya bantu ne ya bama-

laika, ange nkidi na butemwe, sanga ndi bitu bwa minsenkele yo ba disha, nansha minsakai yo ba sekensha.

Yoano 21:16

Wa mu laka ne dibidi amba, Simona mwana wa Yoano, wa ntemwa ani? Aye amba, E, Nkambo, wa yuka byo na ku temwa. Yesu wa mu laka amba,, Wikale ku swaka mikoko yami.

1 Yoano 3:14

Twa yuka amba twa fuma mu lufu ka tu di mu mweo, mwanda twa temwa bamwanetu. Wa ku bula butemwe u kidi mu lufu.

LULANGUKILO LWA YESU KRISTU

Wa penwe ku tapwa pa myanda yetu, ne ku langulwa amba tu bingishiwe. — Roma 4:25

Marko 16:9

Yesu lo a langwike mu bafu lufuku lutanshi lwa lumingu lukelokelo, kitanshi wa mwekele Maria mwina Magdala ye a fumishemo bibanda musamfu.

Ne atwe twi bamboni, twa mwene byonso byo a ubile mu ntanda ya Bayuda ne mu Yerusalema. Ku pela ba mwipeye, ba mu popela pa musalabu. I Leza wa mu langwile lufuku lwa busatu, ne ku mu mwesha ku bantu, ino kenshi ku bonso, i kwi yenka

atwe bamboni ba tongwelwe kala kwi Leza. Atwe bano twa dile nandi ne ku toma, lo a langwike mu bafu. — Midimo 10:39-41

Yoano 20:26-28

Mafuku munane ku pita bana ba bwanga ba di mu nzubo ponka, ne Tomasi wa di nabo. Yesu wa ishile, bibelo kasha bya shinkwa. Wa imana mu bukata wa laka amba, Mutende wikale nenu. Ebiya wa laka Tomasi amba, Leta munwe obe kuno. Tala maboko ami. Leta kuboko kobe u tweshe mu mbafu yami. Ke kwikala na milengulwilo, itabila. Tomasi wa mu laka amba, Nkambo wami, Leza wami.

LULANGUKILO, LUKETEKELO LWETU LUKATA 39

Yoano 5:25 ne 28, 29

Kine kine ne mi bula amba, Nshita i ka fika ne dino ya fika kala, lo bafu ba ka teleka diwi dya Mwana wa Leza, ne ba kwi di teleka ba ka mona mweo. . . . Ke ku kumya kino kintu, pantu nshita i ka fika yo bonso ba di mu mashimbwe, pa ku teleka diwi dyandi, ba ka tambamo. Ba ubile bya ku wama ba ka langukila ku mweo, ne ba ubile bibi ba ka langukila ku kidye.

Roma 6:3-5

Ka mu yukile amba atwe bonso ba batishiwe mwi Kristu Yesu, i mu lufu lwandi mo twa batishiwe? Pa ku batishiwa, twa

shikilwe nandi pamo, mu lufu lwandi, amba byonka byo Kristu a langwilwe mu bafu mu lukumo lwa Leza Tata, netu twe-ndeke monka mu mweo mupya. Pantu byo twa sambakaniwa nandi pamo mu kipalanisho kya lufu lwandi, sanga mu lulangukilo lwandi namo i pamo.

Mateo 16:21

Ku fuma aya nshita Yesu wa tendeke kwi ba lumbulwila bana bandi ba bwanga amba, Ki saka ngye ku Yerusalema, nka manikwe lwine ku bakulumpe ne bananga bakata ne bafundishi ba Mijilo, kabidi ba ka ntapa, ino lufuku lwa busatu nka langulwa.

1 Petero 1:15

Adi Mwine wa kwi mīta byo a di wa lwafyo, nenu mwikale ba kwishidika mu mikadilo yenu yonso.

Luka 1:74, 75

Wa lapile amba, Nke mi pokolola ku maboko a balwani benu. Amba mwikale ku ñingidila kwa ku bula moyo, mafuku onso a mweo wenu. Kabidi amba, mwikale ba lwafyo, bololoke, ku menso ami.

2 Timote 2:21

Ange muntu witokesha ku bintu byonso bya ku bipa, winge-kala bwa kibeya kya buneme,

kya ku shidikwa, kya ku ketekelwa ku mwine wa nzubo, kya ku fwanina kwingila midimo ya ku wama.

Anwe batongolwe ba Leza Tatta bo a yukile dimo, bo a tongwele amba mu shidikwe ku Musingitu, mu nakile Yesu Kristu, mu sankilwe mashi andi. Mu mone bwingi bwa bupe ne mutende.

— 1 Petero 1:2

2 Korinda 7:1

Anwe batemwe, byo be tu laka abi, sanga twitokeshe ku byonso bi jilula mubidi ne mutima, ne kwishidika biya mu byonso mwanda wa ku tina Leza.

1 Yoano 1:9

Ange twa sokola bubi bwetu atwe bene, aye i wa kine, i moloke, wi tu lekela bubi bwetu, ne kwi tu samfya ku bubi bonso.

Isaya 35:8

Mu kekala musebo mukata. Adya dishinda di ka telwa bu Dishinda dya ba kwishidika; mujiluke kenshi a ka pitemo; poso bonka abo: bapiteshinda, nansha i ba ku bula mano, kenshi ba ka lubilemo.

Mateo 3:11

Ami kine ne mi batisha mu mema bu kiyukidisho kya lulapilo, adi ao wiya kunyuma

kwami wa nkila bulobo. Ami nki fwaninwe nansha ku sela bikwabilo byandi. Aye u ke mi batisha mu Musingu wa lwafyo ne mudilo.

Heberu 13:12

Yesu nandi kyo a manamine pantanda pa mushi amba a koshе kwi ba shidika bantu na mashi andi aye mwine.

Efesa 1:4

Leza wi tu tongwele mwi aye lo ntanda ka yange ku pangwa, amba twikale ba lwafyo ba ku bula nansha kabulema ku menso andi monka mu butemwe.

42 BA KU YULWA NE MUSPIRITU

Luka 11:13

Anwe babi byo mwa yuka ku pela bana benu bintu bya ku wama, i byepi Tata wa mwiulu, kenshi a kilepo mu ku pana Muspíritu wa lwafyo ku ba ku mu lombamba?

Midimo 1:8

Adi mu ka pewa bulobo, lu ke mi fikila Muspíritu wa lwafyo. Ebiya mu kekala bamboni ba ku sapula myanda yami.

Roma 8:9

Adi anwe ka mu di mu buntu-nshi, mu di mu Muspíritu, ange kine Muspíritu wa Leza wikala munda mwenu. Adi ange muntu

kadi ne Muspíritu wa Kristu, sanga kadi muntu wa Kristu, yo.

Midimo 13:52

Adi bana ba bwanga ba yudilwe ne lusekelo ne Muspíritu wa lwafyo.

Midimo 4:31

Lo ba pwile ku lombela, nzu-bo yo ba pwidilemo ya tentele. Bonso ba yudilwe ne Muspíritu wa lwafyo, ka ba lake mwanda wa Leza ne bulobo.

Ezekela 36:27

Kabidi nka bikamo muspíritu wami wa kwi mi fundisha mwaila mijilo yami. Anwe mu ka lama mikambishilo yami, ne kwi i uba.

MILAI YA NKAMBO KU BENA KRISTU 43

Nimbo 37:3

Ketekelai mwi NKAMBO, ne kuba bya ku wama; ikalai mu ntanda yenu, kasha mu saka bya kine.

Nimbo 34:18

NKAMBO u di pepi ne mutima mutimuke; u pulusha ba mutima wa ku fitwa pa bubi bwabo.

Bimwesho 21:4

Leza u ke ba shimuna mipolo mu menso abo. Kenshi ku kekale lufu ponka, nansha madilo. Misowa ne misongo yonso ke kutupu, pantu bintu byonso bya kala bya pita.

Isaya 66:2

NKAMBO wa laka amba, Pantu abi bintu byonso i kuboko kwami kwi bi pangile, byo byonka abi byo bya pangilwe abi bintu byonso. Adi ami, muntu ye ntalako i uno, awa mulanda, wa mutima mulapile, u tutuma pa kumfwa mwanda wami.

1 Petero 4:12, 13

Anwe batemwe, ke ku kumya awa mudilo wa kwi mi eseka, bwa kintu kipya ki mi fikila. Adi sekelai byo mu manama pamo ne Kristu, mwanda lo a ka mweka mu lukumo, nenu mu ka mona lusekelo lukata.

44 MYANDA YA KU KWASHA BA KWESSEKWA

Nimbo 34:19

Mololoke u di ne mikokolo mingi: adi NKAMBO u mu pokolola mu aya mikokolo yonso.

Adi twa yuka amba bintu byonso bingila pamo, ku kwasha ba temwa Leza, aba ba itwa mwaila mutima wandi. — Roma 8:28

Yakoba 1:12

Muntu u lumbuluka mu mikokolo i wa dyese, pantu mikokolo pa ku pwa u ka pewa kitebo kya mweo, kyo a laya Leza ku pela ba ku mu temwa.

1 Korinda 10:13

Kwesekwa kwenu i pamo ne bantu bonso, adi Leza i wa kishi-

nka. Kenshi e mi leke mwesekwe ku kila bulobo bwenu, adi pa kwesekwa u ke mi pa bulobo bwa kwimana ne ku shinda.

Pantu byo a esekwe mu ku manama, u kosha ku kwasha bonso ba esekwa. — Heberu 2:18

Roma 16:20

Leza wa mutende wa ya e mi nyantishe Satana bino bino, ne ku mu sansaula.

Isaya 43:2

Lo u pita mu mema, nkekala nobe; lo wabuka mikola, kenshi i ka ku bunshe: lo u pita mu mudilo, kenshi u ka pye; nansha lubebe kenshi lu ka ku soke.

Bimwesho 2:7

Wa matwi a teleke bi laka Mu-
spiritu ku bipwilo. Wa ku shinda
nka mu pa luhusa Iwa ku dya ku
kiti kya mweo ki di mu budimi
bwa Leza.

Bimwesho 3:5

Wa ku shinda u ka fwikwa bi-
sandi bitoka. Ami kenshi nka shi-
mañanye dizina dyandi mu dibu-
ku dya mweo, adi nka mu tela
ku menso a Tata ne a bamalai-
ka bandi.

Bimwesho 3:12

Wa ku shinda nka mu lenga
kwikala bu dipanda mu nzubo
ya Leza wami. Kenshi u ka ta-

mbamo ponka nansha panene.
Pa mubidi wandi nka lembapo
dizina dya Leza wami ne dya mu-
shi wa Leza wami, Yerusalema
mupya, u kekila ku fuma mwiu-
lu kwi Leza wami. Kabidi nka
lembapo ne dizina dyami dipya.

Bimwesho 3:21

Wa ku shinda nka mu pa lu-
husa Iwa ku shikata nami pa
kipona kyami, byonka byo na
ubile ami. Na shindile, dino na
shikata ne Tata pa kipona kyandi.

Bimwesho 21:7

Wa ku shinda u ka pewa bino
bintu. Nkekala Leza wandi, na-
ndi u kekala ke mwana wami.

1 Korinda 7:10, 11

Ba mu kyupo abo ne ba kambisha, weia kenshi i ami, i Nkambo mwine: mwanamukashi ke ku lekana na mulume. Ange ba lekana, sanga ekale bitu bushike. Ange yo, sanga a bwelele ku mulume wandi. Mwanamulume nandi i mujilo ku kana mukashi.

Roma 7:2, 3

Mwaila mijilo, mwanamukashi u di mu luhusa lwa mulume lo a kidi mumi. Adi ange mulume wa fwa, sanga wa fungulwa, ka kidi mu luhusa lwandi. Ku lenga ange a songolwe ku ungi lo mulume wandi u kidi mumi, u ka

telwa bu wa bukende. Adi ange mulume wa fwa, sanga wa fungulwa.

Luka 16:18

Yense u panga mukashi, wa songola ungi, sanga wa bala bukende. Kabidi ne wa songola ye ba kana ku mulume, sanga nandi wa bala bukende.

Mateo 5:32

Adi ami ne mi bula amba, Yense muntu wa ku panga mukashi wandi ange kenshi pa mwanda wa bukende, sanga wa mu lengesha ku bala bukende. Kabidi muntu wa ku songola mulubulwe, nandi wa bala bukende.

Yoano 14:3

Ngya kwi mi lungikila kifulo. Ange nka pwe kwi mi lungikila kifulo, nkeya ponka ne kwi mi twala ami mwine, amba ko ndi ami, nenu mwikale konka.

Bimwesho 3:11

Abo ngiya bino bino bitu. Kwatisha kyo u di nakyo, ku ti-na ba ka ku pokolola kitebo kyo-be kya bu kashinde.

Marko 8:38

Ange muntu wa umfwa nsoni mwanda wa ami ne pa myanda yami, mu bano bantu babi ba bukende, sanga Mwana wa muntu

nandi u komfwa nsoni pe awa muntu, lo a keya pamo ne ba-malaika ba lwafyo mu lukumo lwa Shandi.

Mateo 24:30

Ebiya ke kiyukidisho kya Mwana wa muntu ki ka mweka mwiulu. Mikoka yonso ya pano pantanda i ka dila, kabidi ba ka mu mona Mwana wa muntu wiya pa makumbi a mwiulu, ne bulobo ne lukumo lukata.

Mateo 24:27

Pantu Mwana wa muntu u keya bwa kipeni kya beka kwabukanya mwiulu, ku fuma ku kabanga ku fika ne ku mbonshi.

Luka 12:40

Ku lenga tengelai, pantu Mwana wa muntu u keya pa nshita yo ka mu ketekele.

1 Yoano 3:2

Batemwe, tu di bana ba Leza kala. Nansha ka kyange ku yukanika byo tu kekala, twa yuka amba lo a ka mweka tu ka mu pala, mwanda tu ka mu mona byo a di.

Bimwesho 16:15

Abo ngiya bwa ngifi. Wa shuka awa u tengela ne ku lama biya bisandi byandi, ku tina amba wa kenda bwamba, ne nsoni yandi ya ka mweka.

Pantu Mwana wa muntu wiya ne bamalaika bandi mu lukumo lwa Shandi. Pa kwiya u ka fweta muntu yense mwaila byubilo byandi. — Mateo 16:27

Midimo 1:11

Be ba laka amba, Anwe bena Galilea, mwanda ka mwa imana abi, mu tala mwiulu? Awa Yesu wa twalwa mwiulu ku fuma ko mu di, u ka bwela mu musango umo onka o mwa mu mwenamo pa ku ya mwiulu.

Luka 21:27

Ebiya ba ka mona Mwana wa muntu wiya mu dikumbi, ne bulobo ne lukumo lukata.

MYANDA YA LEZA

Luka 21:33

Dyulu ne ntanda bi ka pita, adi myanda yami kenshi i ka pite nansha panene.

Mateo 22:29

Yesu wi ba lakile amba, Mwa luba, pantu ka mu yukile bya lembwa, nansha bulobo bwa Leza.

2 Petero 1:21

Pantu kutu ñanga musapwishi wa lakile ku luhusa lwandi mwine, adi bantu ba lakile myanda i ba pele Leza Mwine, monka mwi ba twele Muspiritu wa Iwafyo mu bulobo bwandi.

Ñimbo 119:105

Mwanda ōbe i lampi wa maulu ami, i kikela kya ku m̄unikila dishinda.

2 Timote 3:16

Myanda yonso ya mu Mukanda wa Leza ya lembelwe ku Muspiritu wa Leza. I di ne bulobo bwa ku fundisha bantu, ne kwi ba lengulula, ne kwi ba dingila ne kwi ba kwasha, ba yuke mwa kwikadila bololoke.

Ñimbo 119:11

Myanda yobe ne i tula biya mu mutima wami, ku tina na ka bala bubu kwi obe.

Text has been reprinted from the New Testament in Kisanga by permission of Alliance Biblique Universelle, 1974.

Published in numerous languages by World Missionary Press as God supplies funds in answer to prayer. If you would like more copies for careful distribution, write in English to:

**WORLD MISSIONARY PRESS, INC.
BOX 120
NEW PARIS, INDIANA 46553 U.S.A.**

Zaire

SNG

*143 Kisanga
Printed in USA*